



Senin, 11 April 2022
Ogen: 1 Raja-Raja 19:13-18



"Ndarat Janah Tedis"



Mbiar, e me penggejapen si la teneng, la aman, ras la dame. Biasana perasan mbiar e jadi erkiteken; erbahan kesalahaen. Bagi anak sekolah si la ndungi PR si ibereken guru. Mbiar ia adi kari guru mereken ukumen man bana. Mbiar adi suntik vaksin, e maka bahanna erbage alasen sakit, lit pinakit bawaan, ras sidebaanna. Banci ka mbiar erkiteken iayak-ayak ras iancam ukumen mate. Mbiaar man perutangen, keredit ras sidebanna. Pernah nge kam mbiar entah kai gia sebabna?

Elia i bas kebiaren si mesangat. Tupung ia erpersukuten man Dibata, 40 tentera ratu Isebel, banci italukenna. Tapi, tupung ia ancam ras iayak-ayak persuruhen Isebel, mbiar ia. Kiam ia, daramina ingan cebuni si aman ras nyaman man bana. Lanai ia pag ngidah ise pe. Tempa adi cebuni ia enggo aman naring. Erkiteken mbiar, Elia lanai pang ngalaken erbage-bage persoalen. I bas persoalenna si mberat e Elia lanai erlebuh man Tuhan. Penggejapen iayak-ayak e jadi nduh nari ngenca. Nadingken persoalen labo kepe ndungi kebiaren. Persoalen e arus ialaken. E maka nina Tuhan man Elia, ndarat janah tedis i bas inganndu. E maka icidahken Dibata kuasaNa mpedarat Elia i bas inganna cibuni nari. Elia ndarat ras tedis guna ngidah kerna perbahanen Dibata bana guna nampati Elia i bas ia iayak-ayak guna ibunuh. Tupung kita ngalaken persoalen e alu gegeh Dibata ngasup kita naluken persoalen e. Tapi tupung gegehta si andalken naluken persoalenta, turah aru ate, cemas ras depresi. I tengah erbage persoalen e ipersingeti kita gelah tetap erpersukuten man Tuhan. . Labo ipulahi Tuhan persoalennta e, tapi iberekenna ka dahin si mbaru guna ilakoken. I bas kepatuhennta ndalanken persuruhen e, kita ipegegehi, la bahanna kita jadi kalak si percicik, isamptiNa kita naluken persoalen e ras ipetedisna kita gelah paguh ndahiken dahin e .